

Dithero tsa Tirelano mo Kutlwanong

08/2016 Thero ka Sontaga 2 morago ga moletlo wa go gopola botsalo jwa Morena, e le ka 03. 01. 2016

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno, le kwadilwe mo go Joh. 1:14b: **"Ra bona kgalalelo ya loe, e le kgalalelo e e lebanyeng yo o tsetsweng a le esi, e tswa mo Rara, a tletse bopelotlhomogi le boammaarui.."**

1.Sefela sa 51 -51/58

2. Thapelo: Rara wa rona yo o mo legodimong, re lebogela bopelotlhomogi le bopelonomi jwa gago, ka o re rometse Jesu Keresete, Morwao gore a nne motho gore a re golole mo losong lo lo sa khutleng. Re a lebogela moletlo wa go gopola botsalo jwa gagwe, ke sebaka se re gopolang botsalo jwa ga Jesu Keresete Mopholosi wa rona. Ke gona re kgopang gore o re abele le kajeno Mowa o o Boitshepo gore o re bitse, o re sedimosetse, o re tiise, o re itshekise ka lefoko le le boitshepo la gago. Re kopa jalo mo leineng la ga Jesu Keresete, Morena wa rona. Amen.

3.Lefoko la Testamente e kgologolo le kwadilwe mo go Jesaya 61:1-10;

Epistolo ka fa thulaganyong ya 6 e kwadilwe mo go Baroma 6:35-27;

Efangele ka fa thulaganyong ya 1 e kwadilwe mo go Luka 2:41-52.

4.A go ipolelwe tumelo ya bokeresete!

5. Sefela sa 54 - 54/61

6.Thapelo **ya** mmabi wa thero

7. Epistolo ka fa thulaganyong ya 2 e kwadilwe mo go 1 Joh. 5-23-14, e re: "Dilo tseo ke di lo kwaletse gore lona ba lo dumelang mo leineng la Morwa Modimo, lo itse gore lo na le botshelo jo bo sa khutleng. Mme namatshego e re nang nayo mo go ona ke ya gore o a re utlwa, fa re kopa sengwe ka fa go rateng ga ona." Amen.

8. Thero: Barategi mo Moreneng, go tloga mo moletlong wa go gopola botsalo jwa Morena, go ya mo letsatsing la kajeno re utlwile ditiragalo tse di kwadilweng mo kgaolong yotlhe ya bobedi ya Efangele ya ga Luka, re utlwile ka ga kgakgamatso e kgolo ya go lekolwa le go tsamaelwa ke Modimo, ra utlwa ka ga botsalo jwa ga Jesu Keresete kwa Bethlehem, ka ga thupiso ya gagwe, ra utlwa le tumiso ya ga Simeyone mo tempeleng, le tumiso ya ga Hana ya go tumisa Modimo ka ntlha ya lesea le Simeyone a mo tshotseng ka mabogo mo tempeleng ya kwa Jerusalema. Ka Efangele

ya kajeno re utlwile tiragalo ya ga Jesu, fa a ne a sala mo tempeleng, le go botsa Maria le Josefa a re: "Lo ne lo mpatlelang? A lo ne lo sa itse gore ke tshwanetse go nna mo go tse e leng tsa ga Rre?" Ntlo ya Modimo ke ntlo le legae la ga Jesu Keresete. Ke sesupo, fa e le Morwa Modimo. Ke kgakgamatso e re e gopolang ka nako yotlhe, re ntse re ipolela jalo ka boipolelo jwa bokeresete, le ka go opela ka ga yona mo difeleng tse dintsi. Morena o re gopotse, re ntse re letse mo boleong, a bona tshenyegoya rona, a re thusa. Re ntse le tletse maleo, mme Modimo ke Rara yo montle, a re batla, a bolelela Morwaaona, a mo raya, a re: "Yang teng kwa bathong, ba ba losong le thogakong, o ba bogele petso." Morwa Modimo a araba, a re: "Ee, Rra, ka pelo yotlhe ee, bokete ke a bo rwala, mme tsotlhe tse o di ratang, ke tla di dirafatsa." Ka difela tsa kereke ya rona, re boka Modimo ka tse o di re diretseng, re ipolela Efangele ya ga Jesu Keresete, re basupi ba boammaaruri jo e leng Jesu Keresete ka esi, lefatshe le bo utlwe, le utlwe tse Jesu a di diretseng batho botlhe gore ba bone tsela e e yang mo botshelong jo bo sa khutleng kwa legodimong, re le basupi ba ga Jesu Keresete yo e leng Morwa Modimo.

Lefoko la thero ya kajeno le kwadilwe mo lokwalong lwa 1 lwa ga Johane. Re tshwanetse go ithuta Efangele e e kwadilweng ke Johane yo gore re tlhaloganye sentle lefoko la thero ya kajeno. Jesu o ne a raya Mareta, kgaitsadie Lazaro yo o tsositsweng mo losong, a re: "Ke nna tsogo le botshelo; yo o dumelang mo go nna o tla tshela, le fa a ka swa. Mongwe le mongwe yo o tshelang, a dumela mo go nna, ga a ka ke a swa ka motlha ope." Fa re tlhokomela sentle, re tla utlwa gore Jesu ga a re tlišetsa botshelo fela, mme mo godimo ga moo ke ene yo e leng botshelo. Botshelo bo tswa mo go ene fela, e ntse e le ene Motlhodi wa legodimo le lefatshe, mo go Modimo, mo go Morwaaona, e bong Jesu Keresete. Mo go ene batho ba bona botshelo ka go dumela mo go ene ka fa lona la ga Jesu le le reng: "Ke nna tsela, le boammaaruri, le botshelo, ga go ope yo o ka fitlhang kwa go Rara, fa e se ka nna." Le foo Jesu o a re gakolola gore ke ene yo e leng botshelo jwa nnete, a ba a re ruta gore ke ene fela yo o kgonang go letlanya batho le Rraagwe, Modimo o e leng Modimo o o tshelang. Ga go ope yo o ka fitlhang mo go Modimo Rara, fa e se ka Morwaaona yo o tsetsweng a le esi. Le mo matsenong a lokwalo lwa 1 lwa gagwe re rutiwa gore Jesu Keresete ke "Lefoko la botshelo" ka mafoko a a reng: "Re lo anegela se se neng se le teng go tloga tshimologong, se re se utlwileng, se re se bonyeng ka matlho a rona, se re se lebileng, se diatla tsa rona di se fophotseng, e bong sa Lefoko la botshelo - mme botshelo bo bonetse, re bile re bo bonye; re a supa, re lo begela botshelo jo bo sa khtutleng, jo bo

neng bo le fa go Rara, mme bo re bonagetse - Se re se bonyeng, ra se utlwa, le lona re a se lo rerela gore le lona lo nne le kopano le rona; mme kana kabelano ya rona ke ya go kopana le Rara le Jesu Keresete Morwawe. Dilo tse re di lo kwalela gore boitumelo jwa lona e nne jo bo tletseng.”

Go dumela mo go Jesu Keresete bo re kopanya le ene yo e leng botshelo jo bo sa khutleng. Go dumela mo go Jesu Keresete, Mopholosi wa batho ke neo go bonana le Rara wa rona yo o mo legodimong, yo e leng Modimo o o tshelang. Ke sona se se tsamaisang lefoko la ona mo merafeng yotlhe. Efangele e e rerelwa lefatshe lotlhe, go fitlhela kajeno gore batho ba tlabologe, ba dumele, ba tshale. Johane a re: Ditshupo tse di kwadilweng di kwadilwe gore “lo dumele, fa Jesu e le Keresete, Morwa Modimo, mme ka go dumela lo bone botshelo ka leina la gagwe.” Barategi mo Moreneng, tumelo e re abela botshelo. Johane a kwala, a re: “Dilo tseo ke di lo kwaletse gore lona ba lo dumelang mo leineng la Morwa Modimo, lo itse gore lo na le botshelo jo bo sa khutleng.” Barategi mo Moreneng wa rona Jesu Keresete, tumelo e re fa botshelo. Yo o dumelang mo go Morwa Modimo o na le tshupo mo teng ga gagwe. Yo o sa dumelang mo go Morwa Modimo o o dirile moaki, ka a se ka a dumela tshupo e Modimo o e supileng ka ga Morwaaona. Mme tshupo eo ke e e reng; Modimo o re neile botshelo jo bo sa khutleng, mme botshelo joo bo mo go Morwaa-ona. Yo o nang le Morwa o na le botshelo, yo o se nang Morwa Modimo ga a na botshelo.” Barategi mo Moreneng wa rona Jesu Keresete, go na le loso le botshelo. Go na le loso lo lo sa khutleng, le botshelo jo bo sa khutleng bo teng. Yo o dumelang mo go Jesu Keresete o na le botshelo jo bo sa khutleng. Yo o sa dumelang ga a na botshelo, o na le loso, loso lo lo sa khutleng. Go na le tatlhego e e sa khutleng, mme gape go na le go busa mmogo le Jesu Keresete mo botshelong jo bo sa khutleng mo pusong ya gagwe. Tumelo ya rona ya go dumela mo go Jesu Keresete e re naya botshelo jo bo sa khutleng. A re se ka ra tshwakgafala, mme re tlhokomele tumelo e ya rona, re e jese, re e tsholele sejo sa semowa, re tlhokomele lefoko la Modimo thata, re atamele mo therong, mo boipobolong le mo selalelong sa Morena, re rapele, re opele difela tse di boitshepo, re nne re itshwarelwe dibe. Tseo di bonala mo tirelong ya Modimo. Ka tirelo eo Mowa o o Boitshepo o tiisa tumelo ya badumedi ba ga Keresete. Johane e bile o kwaletse badumedi lokwalo lo lwa gagwe gore ba bolokelwe mo tumelong ya nnete.

Thero eno ngayithumela ubaba ka kgwedi ya phatwe ka ngwaga o o fetileng gore a e fetolele mo Setswaneng, e romelwe baruti le bareri ba kereke ya rona le ba bangwe ba ba ratang dithero tse di rongwang gore lefoko la Modimo le taboge, le tsamaye, le gorosiwe mo go ba bantsi mo Borwa jwa Aferika, ba bolokelwe le bone mo tumelong ya go dumela mo go Jesu, ba tswelele ka tebogo mo tseleng e e yang mo botshelong jo bo sa khutleng, ba e fetisetse le mo go ba bangwe. Ka jalo go angwe ba bantsi, ba utlwe, ba bolokelwe mo tumelong. A mongwe le mongwe yo o thusang ka go kwala thero e e rongwang a itse gore o na le phuthego ka Sontaga le Sontaga o ka re e feta ka bantsi phuthego ya gagwe kwa a tshwarang tirelo-Modimo mo gae. A ba ba di amogelang ba di dirise gore Mowa o o Boitshepo o dire mo go bona le mo go bangwe ba bantsi. Barategi mo Moreneng, lefoko la Modimo le sa ntse le le teng mo gare ga rona. A re se ka ra le nyatsa, mme re le dirise sentle. Ke sejo sa mewa ya rona, ke sejo sa mewa ya bakaulengwe ba rona ba ba gaufi le ba ba kgakala. Jesu Keresete ga a ka a re roma, rona ba re leng badumedi le badiredi ba gagwe gore re didimale fela, mme e le go dira barutwa ka go ba kolobetsa, le go ba ruta mo merafeng yotlhe. Go simolotse jalo bogologolo kwa Jerusalema, Johane ene o ne romelwa kwa diphuthegong tsa kwa Asia a ba di romela lokwalo lwa Tshenolo gore ba tiisiwe mo tumelong ka lefoko la Modimo.

Lefoko la thero ya kajeno le re: "Dilo tseo ke di lo kwaletse gore lona ba lo dumelang mo leineng la Morwa Modimo, lo itse gore lo na le botshelo jo bo sa khutleng." Ka mafoko ao o a re tlotlheletsa go nna bopelokgale ka ntlha ya ga Jesu Keresete yo e leng botshelo jwa rona, gonne re dumela mo go ene. Re dumela mo go ene. Ka jalo re na le botshelo jo bo sa khutleng. Le fa re se na tshiamo, le e seng tshwanelo epe gore a re bolokele mo tumelong, mme o re abela ka bopelothomogi jwa gagwe gore re dumele mo go ene yo o re abelang boitshwarelo jwa dibe le botshelo jo bo sa khutleng. Ke ona maikaelelo a a mo tlišeditseng mo lefatsheng gore a re senke, a re pholose, a re golole mo dithateng tse di bosula, a re busetse mo go Rara wa rona yo o mo legodimong, re nne re tlhomame mo tumelong ya go dumela tsholofetso ya gagwe e e reng: "yo o dumelang a kolobediwe, o tla pholoswa. Modimo a o re abele dineo tsa ona mo go Keresete Jesu. Amen.

9. Thapelo: Modimo, Rara wa rona yo o mo legodimong, boloka barongwa ba gago ba ba rerang Efangele mo gare ka batho mo mafatsheng otlhe. Romela ka metlha badiri mo tshimong ya gago ya moweine gore batho ba utlwe lefoko la gago, ba dumele mo

go Morwao, ba pholoswe, ba tshele botshelo jwa gagwe jo e leng botshelo jo bo sa khutleng. A abele baruti thata ka Mowa o o Boitshepo gore ba rerele batho Efangele ya ga Morwao Jesu Keresete. Re kopa jalo mo leineng la ga Jesu Keresete, Mopholosi wa rona. Amen.

Thapelo ya Morena: Rara wa rona yo o mo legodimong ...

10. Sefela sa 57 - 57/65

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke P. C.Weber ,ka ngwaga wa 2015

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.